

ԲՈՎԱՆԴԱԿՈՒԹՅՈՒՆ

1. Ներածություն	3
2. Հետազատական համատեքստ	5
3. Գործնական համատեքստ	8
4. Հետազոտական ընթացք	11
5. Տվյալների մշակում և վերլուծություն	13
6. Եզրակացություն	15
7. Օգտագործված գրականության ցանկ.....	16
8. Հավելվածներ.....	17-20

ՆԵՐԱԾՈՒԹՅՈՒՆ

21-րդ դարում գիտության առաջընթացը պահանջում է գիտելիքներով, հմտություններով և կարողություններով զինված քաղաքացի, իսկ դպրոցն այն հիմնական օղակն է, որտեղ ձևավորվում է այդ քաղաքացին: Ժամանակակից դպրոցներում աշակերտներն ունեն զարգացման և պատրաստվածության տարբեր մակարդակ: Նրանք ուսումնական գործընթացում ցուցաբերում են գիտելիքների յուրացման տարբեր աստիճաններ և առաջ են շարժվում զարգացման տարբեր տեմպերով: Որպես կանոն, այս դեպքում ուսուցիչը հիմնականում ուսուցումն իրականացնում է հենվելով միջին կարողություններ ունեցող աշակերտների վրա: Այս հանգամանքը արհեստականորեն կանգնեցնում է ուժեղ կարողություններ ունեցող աշակերտների զարգացումը: Նրանք կորցնում են ուսման նկատմամբ հետաքրքրությունը, իսկ թույլ կարողություններ ունեցող աշակերտները դատապարտված են մյուսներից հետ մնալու կարգավիճակին:

Փորձը ցույց է տալիս, որ նույնիսկ միջին կարողությունների տեր աշակերտները նույնպես միմյանցից տարբերվում են իրենց խնդիրներով, դժվարություններով, աշխարհայացքով: Նույն դասարանում սովորում են տարբեր զարգացման մակարդակներով, կոնկրետ առարկայի նկատմամբ տարբեր հակումներով և մտավոր կարողություններով աշակերտներ: Այս հանգամանքները հաշվի առնելով՝ խնդիր է առաջանում տարբեր կարողություններ ունեցող սովորողների համար գտնել ուսումնառության կազմակերպման առավել արդյունավետ ուղիներ: Այս խնդրի լուծման համար ուսուցիչն իր գործունեության ողջ ընթացքում գտնվում է շարունակական պրպտումների մեջ, թե ինչպե՞ս կարելի է դասն ավելի հետաքրքիր դարձնել, ինչպե՞ս կարելի է պահպանել սովորողների կայուն հետաքրքրությունը ուսման նկատմամբ և ինչպե՞ս ապահովել դասարանի բոլոր սովորողների առաջադիմության աճը: Ուստի անհրաժեշտություն է առաջանում սովորողների ուսումնառության կազմակերպման գործընթացում ուսումնասիրել նրանց անհատական առանձնահատկությունները, ապահովել պայմաններ նրանց ընդունակությունների, հետաքրքրությունների, հակումների, ճանաչողական պահանջմունքների բավարարման ու մաքսիմալ զարգացման համար՝ յուրաքանչյուրի նկատմամբ ցուցաբերելով տարբերակված անհատական մոտեցում, ինչը **փաստում է հետազոտության արդիականությունը:** Անհրաժեշտ է յուրաքանչյուր

աշակերտին հնարավորություն տալ ծրագրային նյութը յուրացնել իր կարողությունների սահմաններում, որպեսզի ուսուցումը հարմարեցվի սովորողի զարգացման տեմպերին: Կարևոր է, որ ուսուցիչն իր ձեռքի տակ ունենա ամենատարբեր, բազմաբնույթ, բազմաշերտ առաջադրանքներ, որոնք կօգնեն նրան իրականացնել տարբերակված ուսուցում: Դասաժամերի արդյունավետությունը մեծապես պայմանավորված է ուսուցման ակտիվ ձևերի կիրառումով: Դրանք օգնում են սովորողներին համագործակցել խմբի անդամների հետ, ստեղծում են խմբի համար բարենպաստ միջավայր և փոխադարձ վստահություն են առաջացնում սովորողների միջև : Տարբերակված ուսուցումը ապահովում է բոլոր աշակերտների կողմից կրթության բովանդակության յուրացումը: Տարբերակումը բնորոշվում է սովորողների այնպիսի խմբերի ստեղծումով, որտեղ գործունեության նպատակը, բովանդակությունը, մեթոդները, ձևերն ու արդյունքները տարբերվում են :

Հետազոտական աշխատանքի նպատակն է բացահայտել տարբերակված ուսուցման արդյունավետությունը ֆրանսերենի դասավանդման գործընթացում:

Հետազոտական աշխատանքի խնդիրներն են՝

- ուսումնասիրել տարբերակված ուսուցման բովանդակությունը, ռազմավարությունները և սկզբունքները,
- ցույց տալ տարբերակված ուսուցման գործնական կիրառության ձևերը տարրական դպրոցում ֆրանսերենի դասաժամերին,
- բացահայտել տարբերակված ուսուցման արդյունավետությունը տարրական դպրոցում ֆրանսերենի դասավանդման գործընթացում:

Հետազոտության մեջ կիրառվել են երկրորդային տվյալների վերլուծության, դեպքերի ուսումնասիրության (Case Study), անկետավորման, համեմատության, տվյալների վերլուծության և մշակման մեթոդները:

ՀԵՏԱԶՈՏԱԿԱՆ ՀԱՄԱՏԵՔՍ/ ԳՐԱԿԱՆՈՒԹՅԱՆ ԱԿՏԱՐԿ

Տարբերակված ուսուցումը ուսուցչի կողմից միևնույն բովանդակությունը մատուցելիս տարբեր ռազմավարությունների և բազմաստիճան առաջադրանքների կիրառումն է՝ հաշվի առնելով յուրաքանչյուր սանի կարողությունների մակարդակը:

Ըստ Բոլտյանսկու. <<Տարբերակված ուսուցումը, դա.

-ուսումնական գործընթացի կազմակերպման ձև է , որի ընթացքում ուսուցիչը աշխատում է ուսումնական պրոցեսի հետ կախված որևէ գործառույթով կազմավորված խմբերի հետ

-դիսակտիկ համակարգի ընդհանուր մաս է, որը ապահովում է սովորողների տարբեր խմբերի հետ ուսումնական գործընթացը>> [12]:

Ուսուցման մեջ տարբերակված մոտեցումը տարբեր տիպի դպրոցների, դասարանների, խմբերի համար ուսուցման բազմապիսի պայմանների ստեղծումն է հաշվի առնելով անհատական առանձնահատկությունները:

Մերօրյա դպրոցում խնդիր է մոտիվացիայի պակասը, և տարբերակված ուսուցումը հնարավորություն է տալիս բարձրացնել սովորողների մոտիվացիան՝ նրանց համար ստեղծելով ինտելեկտուալ զարգացման հնարավորություն: Քանի որ տարբերակված ուսուցումը հնարավորություն է ընձեռում յուրաքանչյուր սովորողի սովորել իր ունակություններին համապատասխան, տալիս է գործողությունների ընտրության որոշակի ինքնուրույնություն, ինչն էլ կարող է ստիպել սովորողին հետաքրքրվել մատուցվող նյութով: Զկան բացարձակ անկարող սովորողներ, պարզապես անհրաժեշտ է բացահայտել նրանց ուժեղ կողմերը և նրանց ուսուցումը կազմակերպել՝ հիմնվելով ուժեղ կողմերի վրա:

Տարբերակված ուսուցման նպատակը ոչ միայն թույլ կարողություններ ունեցող սովորողների կրթական կարիքների ապահովումն է, այլ նաև միջին ընդունակությունների և հետաքրքրությունների լայն շրջանակ ունեցող և բարձր առաջադիմություն ցուցաբերող սովորողների համար հնարավորությունների ստեղծումն է: Հայտնի է, որ դասարանները կազմավորվում են ըստ սովորողների տարիքի, սեռի, բայց նրանց միատարիք լինելը չի ենթադրում զարգացման և պատրաստակամության միևնույն աստիճան: Հաճախ ուսուցիչը ուսումնական գործունեության ընթացքում՝ դասի ժամանակ դժվարանում է որևէ առաջընթաց գրանցել, քանի որ սովորողների միջև առկա են մեծ տարբերություններ, որոնք էլ պայմանավորված են մի շարք հանգամանքներով: Նախ սովորողներն ունենում են տարբեր նախնական գիտելիքներ տվյալ առարկայից, տարբեր կարողություններ, արժեքային համակարգ, բառապաշար, ինչպես նաև՝ ընկալման, ուշադրության կենտրոնացման, լեզվամտածողության, հիշողության տարբերություններ: Պակաս կարևոր

տարբերություն չէ նաև, թե ինչ ընտանիքից է սովորողը, սոցիալ-հուզական ինչ պայմաններում է ապրում:

Լիզ Բիլզը և Վալ Բրուկսը բնորոշում են այն տարբերությունները, որոնք կարող են ազդել աշակերտների ուսումնառությանն ուղղված պլանավորման վրա [2, էջ 40]:

- կրթական տարբերություններ
- հոգեբանական տարբերություններ
- ուսումնառության ոճի տարբերություններ
- սոցիալական, մշակութային և գենդերային տարբերություններ

Լիզ Բիլզը և Վալ Բրուկսը «Տարբերակման կիրառումն ուսումնառության խթանման համար» հոդվածում գրում են. «Այն, որ աշակերտները տարբեր են և ունեն տարբեր կարիքներ համընդհանուր ճշմարտություն է: Ըստ ակադեմիական առաջադիմության ավանդական դարձած տարբերակմանը զուգահեռ տարածում է գտնում նաև այն տեսակետը, որ աշակերտները ունեն ուսումնառության ոճի տրամաբանական տարբերություններ, և հոգալով նման տարբերությունների մասին՝ աշակերտներին օգնում ենք իրացնելու իրենց ներուժը: Տարբերակման միջոցով են ուսուցիչները և դպրոցները հնարավորություն տալիս յուրաքանչյուր աշակերտին իրացնել իր ամբողջ ներուժը: Այն ենթադրում է, որ ուսուցիչները պատկերացնում են անհատների ուսումնառության ոճի նախապատվությունները, նրանց կարիքներն ու դժվարությունները. բացահայտվում են ուսումնառության այն խոչընդոտները, որոնց բախվում են որոշ երեխաներ, և միջոցներ են ձեռնարկվում դրանք վերացնելու կամ գոնե նվազեցնելու ուղղությամբ: Հնուտ տարբերակումը բխում է ուսումնառության կատարելագործման համար անհրաժեշտ գործողությունների հավաստի հայտորոշումից, այդ պատճառով տարբերակումը և գնահատումը դիտարկվում են որպես փոխկապակցված զուգահեռ երևույթներ: Գնահատումը օգնում է ուսուցչին հասկանալու, թե ուսումնառության որ կետում է գտնվում աշակերտը տվյալ պահին և որոշելու հետագա քայլերը. ինչպիսի փորձառությունը, օժանդակությունը կամ մարտահրավերը կօգնեն նրանց առաջընթաց գրանցել: Գնահատումից ստացած տեղեկատվությունը գործողությունների հիմք է հանդիսանում, այդ իսկ պատճառով տարբերակումը և գնահատումը խիստ փոխկապակցված գործընթացներ են: Տարբերակումը ռազմավարությունների համակարգ է, որի նպատակն է համոզվել, որ յուրաքանչյուր աշակերտ դասից հեռանում է ուսումնառության մեջ մի քայլ առաջ կատարած. գիտի ավելին, ավելի խորն է ընկալում, վստահաբար կիրառում է հմտությունները և ուզում է սովորել ավելին» [2, էջ 63]:

Տարբերակված ուսուցում իրականացնելիս ուսուցչի խնդիրն է ուսումնասիրել սովորողների անհատական առանձնահատկությունները, նրանց մեջ սովորելու նկատմամբ

հետաքրքրություն և գիտելիքների բացերը լրացնելու ցանկություն առաջացնելը: Ցանկալի արդյունքի հասնելու համար կարևոր է նշել սովորողների անգամ ամենափոքր հաջողություններն ու ձեռքբերումները, բացատրել նրանց հետ մնալու պատճառները և միասին գտնել դժվարությունները հաղթահարելու ուղիներ: Միայն իր առաջընթացը, նույնիսկ աննշան հաջողությունը զգալը կնդի սովորողին ավելի լավ աշխատելու: Տարբերակված ուսուցման հիմքում ընկած է անհատական մոտեցման սկզբունքը: Ուսուցման անհատականացումն ու տարբերակումը նպաստում է անհատի մտավոր, բարոյական, հուզական և ֆիզիկական զարգացմանը, հնարավորություն է ընձեռում լիովին բացահայտել սովորողի մտավոր կարողությունները, հոգեբանական առանձնահատկությունները: Այս ուսումնական գործընթացում ուսուցչի խնդիրն է ոչ թե սովորողին հարմարեցնել ուսումնական նյութին, այլ ուսումնական նյութը հասանելի ու մատչելի դարձնել յուրաքանչյուր սովորողի համար: Այս մոտեցումը հնարավորություն կտա դասին բոլոր սովորողների ակտիվ մասնակցության, յուրաքանչյուրը կունենա իր անելիքը, իրեն տրված դժվարությունը կլինի հաղթահարելի: Իրենց ընդունակություններին, կարողություններին ու հմտություններին համապատասխան հանձնարարությունների, իրենց համար հաղթահարելի բարդության և ծավալի առաջադրանքների կատարումը կբարձրացնի սովորողների ինքնագնահատականը, ուսման հանդեպ հետաքրքրությունն ու խանդավառությունը:

ԳՈՐԾՆԱԿԱՆ ՀԱՄԱՏԵՔՍ

Տարբերակված ուսուցման հաջողությունը կախված է գործընթացի ճիշտ կազմակերպումից: Ռասարաններում ընդգրկված են տարբեր կարողություններով օժտված երեխաներ, ուստի տարբերակված ուսուցում կազմակերպելիս անհրաժեշտ է հաշվի առնել, որ տարբեր են սովորողների՝

- սովորելու ոճը
- մղումը
- վերաբերմունքը
- հետաքրքրությունները
- ուղեղի կիսագնդերի դոմինանտությունը
- սեռը

Տարբերակված ուսուցման եղանակները կախված են առարկայի բովանդակությունից, առարկայի ծրագրային, չափորոշչային պահանջներից, սովորողների անհատական կարիքներից: Պետք է հաշվի առնել նաև սովորողների ինֆորմացիայի ընկալման տիպերը՝

- վիզուալ (տեսողական)
- աուդիալ (լսողական)
- կինեսթետիկ (շարժողական)

Ուսումնական նույն նյութը անհրաժեշտ է վիզուալ առանձնահատկություններ ունեցողին տրամադրել նյութը բացատրող տեսադասերի ձևով, լուսանկարների, գծապատկերների միջոցով: Աուդիալին՝ աուդիոդասագրքերի, ավելին, կարող են ինֆորմացիան հեշտությամբ մտապահել, երբ այն տրամադրվում է մեղեդու, բանաստեղծության կամ երգի տեսքով: Կինեստետիկին՝ առցանց ինտերակտիվ հանձնարարության [11]:

Տարբերակված ուսուցման հիմքում ընկած է անհատական մոտեցման սկզբունքը: Այն հնարավորություն է տալիս ամբողջովին հարմարեցնել բովանդակությունը, մեթոդները և սովորողի ուսումնական գործունեության տեմպը, հետևել չիմացությունից իմացության անցմանը, ուսումնական գործունեության մեջ ժամանակին կատարել անհրաժեշտ ուղղում: Տարբերակումը կարելի է դիտարկել դասի բովանդակության, գործընթացների և արդյունքների համատեքստում: Տարբերակման ամենատարածված ռազմավարություններն են.

- տարբերակում ըստ առաջադրանքի
- տարբերակում ըստ ռեսուրսի

- տարբերակում ըստ ժամանակի
- տարբերակում ըստ օժանդակության
- տարբերակում ըստ արդյունքի

Տարբերակումը որպես դասապլանավորման մաս, ներառում է դասարանում անհատների և խմբերի որոշակի կարիքները հոգալու համար ուսուցիչների կողմից ձեռնարկած մանրակրկիտ քայլեր: Հետևաբար, դասապլանավորման փուլում միշտ պետք է հաշվի առնել անհատականացված կրթական ծրագրեր ունեցող աշակերտների պահանջները [8]:

Ուսումնական քարտերով առաջադրանքների կիրառումը ևս համարվում է տարբերակված ուսուցման ձև: Ուսուցման գործընթացում վերջիններիս օգտագործումը աշակերտների մոտիվացիան բարձրացնող և արդյունավետ ուսումնական միջոց են: Դրանց կիրառությունը հնարավորություն է ընձեռում էլ ավելի արդյունավետ ընդգրկելու սովորողներին ուսումնական ակտիվության մեջ՝ առաջադրելով նրանցից յուրաքանչյուրի կարողություններին համապատասխան աշխատանք:

Ուսուցման գործընթացում ուսումնական քարտերի առաջադրանքները հնարավոր է վերաբերեն ցանկացած ուսումնական հարցի: Կարևոր է, որ քարտերում տեղ գտած հանձնարարությունները համապատասխանեն տվյալ դասարանի մակարդակին, ուսումնական նպատակին և ակտիվությանը; Ուսումնական քարտերը պետք է կազմել պարզ: Դրանցում տեղ գտած առաջադրանքի պահանջը պետք է հասկանալի լինի աշակերտի համար: Քարտերի տեսքն ու կառուցվածքը ևս պետք է գրավիչ լինեն՝ աշակերտներին ոգևորեն դեպի հիմնախնդիրները լուծելու, խորհելու, հարցեր առաջադրելու [7]:

Տարբերակված ուսուցման ժամանակ յուրաքանչյուր սովորող կարող է ունենալ իր նվաճումների գրանցամատյանը, ինքնագնահատման ռուբրիկը, որտեղ ինքը կգնահատի իր գիտելիքները, հմտությունները և հնարավորություն կունենա համեմատել այն ուսուցչի գնահատականի հետ: Ինքնագնահատումը թույլ կտա սովորողին գնահատել իր սկզբնական արդյունքները ձեռք բերած նոր արդյունքների հետ [10]:

Ուսումնասիրելով այս ամենը՝ հասկանալի է դառնում. որ դյուրին չէ կազմակերպել տարբերակված ուսուցում, թեկուզ հենց այն առումով, որ նման դասերի պլանավորումը աշխատատար է և պահանջում է քրտնաջան աշխատանք, երկար ժամանակ:

Տարբերակված ուսուցումն իրականացվում է 3 հիմնական փուլերով.

1. ճանաչել յուրաքանչյուր սովորողի անհատական առանձնահատկությունները,
2. խմբավորել սովորողներին ըստ իրենց անհատական առանձնահատկությունների

3. տարբերակել յուրաքանչյուր խմբի ուսումնական գործընթացը:

Ուսուցչից պահանջվում է նաև սովորողի անձի զարգացման համար համապատասխան պայմանների՝ ուսումնական միջավայրի ստեղծում, որը ենթադրում է՝

- -հաղորդակցություն, ժողովրդավարական, հարգալից ոճ
- -բոլորի ակտիվ մասնակցություն՝ հաշվի առնելով յուրաքանչյուրի անհատական առանձնահատկությունները, գիտելիքներն ու փորձառությունը
- -աջակցող, խրախուսող, բարյացակամ մթնոլորտ՝ յուրաքանչյուրի համար հաջողության հասնելու հնարավորություններով
- -գիտելիքներ ու կարողություններ ձեռք բերելու դրդապատճառների ապահովում

Ուսուցման արդյունավետությունը մեծապես կախված է այն բանից, թե ով է սովորողը և ինչպես է իրեն պահում ուսումնական գործընթացում: Մանուկ Մկրտչյանի «Ուսուցման մեթոդաբանական, տեսական և գործնական հարցերը» մենագրության մեջ ձևակերպում են ուսուցման կանխադրույթները: Առաջին՝ յուրաքանչյուր առողջ երեխա ի վիճակի է յուրացնել ցանկացած ուսումնական նյութ: Երկրորդ՝ երեխաները միմյանցից տարբերվում են ոչ թե այս կամ այն նյութը յուրացնելու իրենց հնարավորություններով, այլ այդ նյութը յուրացնելու իրենց անհատական ձևով և միջոցներով: Երրորդ՝ աշակերտի հետաքրքրությունը ուսումնասիրվող նյութի նկատմամբ որոշվում է ոչ թե այդ նյութի բովանդակությամբ, այլ այդ նյութի յուրացման գործընթացում աշակերտի գործողությունների հաջորդականությամբ [4, էջ 47]:

ՀԵՏԱՉՈՏԱԿԱՆ ԸՆԹԱՑՔ

Տարբերակված ուսուցման փորձնական հետազոտությունն իրականացվել է ուսումնական քարտերի օգտագործմամբ :

Հետազոտական աշխատանք իրականացրել են Չագիկավանի միջնակարգ դպրոցի տարրական դասարանում՝ ֆրանսերեն առարկայից: Դասարանը բաղկացած 12 աշակերտներից: Նախնական հայտորոշման արդյունքում նպատակահարմար է գտնվել դասավանդած դասարանում, որտեղ կատարում են այս հետազոտական աշխատանքը, ստեղծել երեք խումբ՝ չորսական աշակերտներով, հետևյալ ուսումնառության մակարդակներով.

1-ին խումբ — հմտությունների և գիտելիքների լավ մակարդակով, որոնք կարող են ինքնուրույն գտնել առաջադրանքների լուծումները,

2-րդ խումբ — հմտությունների և գիտելիքների միջին մակարդակով, որոնք կարող են ուսուցչի խորհուրդներով գտնել առաջադրանքների լուծումները,

3-րդ խումբ — հմտությունների և գիտելիքների ցածր մակարդակով, որոնք դժվարանում են գտնել լուծումները, կարիք ունեն լրացուցիչ բացատրությունների և օգնության:

Յուրաքանչյուր խմբում աշակերտների քանակը կարող է փոփոխվել տարբեր օբյեկտիվ և սուբյեկտիվ հանգամանքների պատճառով: Ամեն խմբի համար կազմվում է այնպիսի առաջադրանքներ, որոնք հնարավորություն կտան աշակերտներին ցուցաբերել իրենց գիտելիքներն ու հմտությունները:

Ըստ բարդության աստիճանի իրականացրել են առաջադրանքների տարբերակում: Ամենապարզ առաջադրանքը տրվել է երրորդ խմբին՝ դիտել, ուսումնասիրել քարտերում զետեղված նկարները և կռահել ուսուցանվող տառը ըստ այդ պատկերների, գրի առնել տետրերում, փորձել վերհիշել նույն տառով այլ բառեր և վերհիշել տվյալ տառի վերաբերյալ անցած երգը և փորձել խմբով երգել : Երկրորդ խմբի սովորողներին հանձնարարվել է գրել քարտերում զետեղված պատկերների անունները, դասագրքի նյութից դուրս բերել այդ բառերով կազմված բառակապակցություններ և կարդալ, թարգմանել դասից այդ բառակապակցություններով նախադասությունները: Իսկ առաջին խմբի սովորողներն հանձնարարվել է գրել պատկերների անունները, դուրս բերել բառակապակցություններ, ապա այդ բառակապակցությունները օգտագործել նախադասությունների մեջ, կատարել գործնական աշխատանք՝ գծապատկերով ցույց տալ դասի գլխավոր, բանալի բառերը ընդգծելով նոր երկտառերը (Տես հավելված 2):

Կատարելով անդրադարձ սովորողների ցուցաբերած արդյունքերին՝ կարողացել են առանձնացնել գիտելիքի յուրացման երեք մակարդակ՝

ա) Բարձր մակարդակ - լիարժեք յուրացրել է նյութը, կիրառում է անձանոթ իրավիճակներում, կիրառում է քննադատական և ստեղծագործական հմտություններ:

բ) Միջին մակարդակ - յուրացրել է նյութը, կիրառում է ծանոթ իրավիճակներում, անում է եզրակացություններ:

գ) Նվազագույն մակարդակ- հասկացալ է նյութը, մտապահում է, վերարտադրում է:

Այնուհետև ապահովվել է հետադարձ կապ. Ուսումնական նյութը լիարժեք յուրացրած սովորողներին տրվել է հնարավորություն գիտելիքների խորացման ու ընդլայնման համար: Ուսումնական նյութի լիարժեք յուրացման հարցում դժվարությունների հանդիպած սովորողների համար մշակվել է համապատասխան առաջադրանքներ: Երրորդ խմբի սովորողներին օգնելու հարցում շատ արդյունավետ է օգնական աշակերտների դերը, ովքեր նշանակվում էին առաջին կամ երկրորդ խմբերից: Տարբերակված ուսուցում իրականացնելիս դժվար է ակնկալել լիարժեք արդյունք, եթե տարբերակումը իրականացնում ենք միայն դպրոցում: Հնարավոր լավագույն արդյունքը ստանալու համար անհրաժեշտ է տարբերակել նաև տնային աշխատանքը, ինչը սովորողների ուսումնական գործունեությունն է, որը նրանք պիտի կատարեն ինքնուրույն: Քանի որ տնային աշխատանքը, ինքնակրթության մի ձև է, ուստի պիտի լինի սովորողի համար մատչելի, համապատասխանի նրա գիտելիքներին ու կարողություններին: Տարբերակված ուսուցումը կիրառելիս՝ սովորողներին հանձարարվել է տարբերակված տնային աշխատանքեր՝ համապատասխան նրանցից յուրաքանչյուրի առանձնահատկություններին: Ցածր պատրաստվածություն ունեցողներին տրվել են այնպիսի առաջադրանքներ, որոնք ավելի պարզ են, պարունակում են ավելի քիչ տեղեկություններ, ավելի շատ նկարներ ու ցուցադրումներ: Միջին կարողություններ ունեցող սովորողներին՝ իրենց կարողություններին համապատասխան, իսկ բարձր կարողություններ ունեցող սովորողների առաջադրանքները ավելի բարդ էին, համընդգրկուն, մեծ ծավալով:

Առաջադրանքներ կազմելիս պարտադիր կիրառվել են տարբեր դիտակտիկ նյութեր, սահիկաշար, պաստառներ, տառադարան, ձայնագրություններ և ունկնդրումներ, ինչպես նաև կիրառվել է Quizizz առցանց գործիք:


ՏՎՅԱԼՆԵՐԻ ՄՇԱԿՈՒՄ ԵՎ ՎԵՐԼՈՒԾՈՒԹՅՈՒՆ

Սովորողներին տրվեց երկու հայտորոշիչ թեստ, որոնց արդյունքներն ամփոփվեցին ըստ առաջադրանքների կատարման 50% և ավելի կատարված լինելու:


Ըստ հետազոտության արդյունքների հայտորոշիչ 1- ին թեստի առաջադրանքների 50% և ավելի հաղթահարել է 6 աշակերտ կամ սովորողների 50%-ը:

Հայտորոշիչ 2-րդ թեստի արդյունքները՝ 50% և ավելի հաղթահարել է 10 աշակերտ կամ սովորողների 83,3%-ը (Տես հավելված 1):

Հայտորոշիչ թեստ 1 և հայտորոշիչ թեստ 2
արդյունքների վերլուծություն



Սովորողներին տրվեցին նաև Ելքի քարտեր, որոնց արդյունքների վերլուծությունը ցույց տվեց, որ աշակերտները հավանում են տարբերակված ուսուցման կիրառումը դասապրոցեսին (Տես հավելված 3):



Այսպիսով եկանք այն եզրահանգման, որ ֆրանսերենի ուսուցանման ընթացքում տարբերակված ուսուցում իրականացնելիս՝

- բարձրացել է հետաքրքրությունը առարկայի նկատմամբ,
- ակտիվացել է աշակերտների իմացականությունը,
- զարգացել է վստահությունը սեփական ուժերի նկատմամբ,
- բարձրացել է կոլեկտիվ աշխատելու մշակույթը:

ԵԶՐԱԿԱՑՈՒԹՅՈՒՆ

Ամփոփելով հետազոտական աշխատանքը՝ եկել ենք հետևյալ եզրահանգումներին.

- տարբերակված ուսուցումը գործնականում շատ աշխատատար, բավականին դժվար կիրառվող ուսուցման ձև է, որը պահանջում է մանկավարժական հմտություններ, փորձ, պատրաստվածություն, համբերություն, ցանկություն և ժամանակ, սակայն արդյունավետ է, նպաստում է սովորողների շահադրդման և առաջադիմության բարձրացմանը,
- ուսուցիչը հանդես է գալիս ոչ թե իբրև տեղեկատվության աղբյուր, այլ մենթոր, վերլուծող, որն անընդհատ ինքնահարցադրումներ է անում, թե ինչպես ավելի արդյունավետ դասավանդի, ինչպես մոտիվացնի աշակերտներին և դարձնի ուսուցումը հաճելի զբաղմունք, կարողանում է ռացիոնալ կառավարել դասապրոցեսի ժամանակը, ստեղծում ֆիզիկական և հոգեբանական բարենպաստ պայմաններ և խթանող ուսուցման միջավայր յուրաքանչյուր սովորողի համար, դասավանդման մեթոդաբանության մեջ որդեգրում դասավանդման և ուսումնառության այնպիսի մեթոդներ ու հնարներ, որոնք համապատասխանում են նրանց պահանջմունքներին ու կարիքներին,
- աշակերտները հետաքրքրություն են ցուցաբերում առարկայի նկատմամբ և գիտակցում են, թե «ինչու են սովորում» և «ինչպես պետք է սովորեն», ներգրավված են ուսումնական գործընթացին և չեն ձանձրանում, վստահություն ունեն սեփական ուժերի նկատմամբ, ցուցաբերում են ինքնուրույնություն՝ իրենց հետաքրքրություններին և հնարավորություններին համարժեք աշխատանքներ իրականացնելիս և զգում են հաջողության բերկրանքը:

Տարբերակված ուսուցումը արդյունավետ է իրականացնել հատկապես Օտար լեզվի դասավանդման պրոցեսին, քանի որ աշակերտները մյուս ուսումնասիրվող առարկաները սովորում են իրենց մայրենի լեզվով և ինքնարտահայտվելը, որևէ նյութ վերլուծելը ավելի հեշտ է տրվում մայրենի լեզվով, իսկ օտար լեզվով առավել բարդ է քանի որ կան լեզուների համարժեքության խնդիրներ, և անհատական մոտեցումը յուրաքանչյուր աշակերտին ավելի է կարևորվում:

ՕԳՏԱԳՈՐԾՎԱԾ ԳՐԱԿԱՆՈՒԹՅԱՆ ՑԱՆԿ

1. Աստվածատրյան Մ.,; Ավագյան Մ.: Թերոյան Գ.:Մանկավարժական կրթության զարգացման հայեցակարգ: Երևան, 2014, 84 էջ:
2. Լիզ Բիլզ և Վալ Բրուկս: Տարբերակման կիրառումն ուսումնառության խթանման համար: << Preparing to Teach in Secondary Schools A STUDENT TEACHER'S GUIDE TO PROFESSIONAL ISSUES IN SECONDARY EDUCATION>>
3. Խաչատրյան Ս.: Ուսուցման արդյունավետ հնարներ, Երևան, 2020:
4. Մկրտչյան Մ. Ուսուցման կոլեկտիվ եղանակի իրականացման մեթոդաբանական, տեսական և գործնական հարցերը: Երևան, հեղինակային հրատարակչություն, 2011, 140 էջ:
5. 101 գաղափար նորարարական մեթոդներ կիրառող ուսուցիչների համար : Բուդապեշտ, 2006, 63 էջ:
6. Մանկավարժական միտք 117, Ջանգակ, 2013: 6. Ամիրջանյան Յու., Սահակյան Ա.: Մանկավարժություն , Մանկավարժ 2005:
7. <http://194school.org/2021/11/educational-cards/?fbclid=IwAR205tpI1CLcBPtmLGXQ5m7NI4r5BO2ODtSw8Mgun9bqkpA1uxVHhZWpY9Y>
8. <https://www.youtube.com/watch?v=bclAqLVkCjA>
9. <https://www.youtube.com/watch?v=c-eaHL7-TIE>
10. <https://forum.amedu>.
11. <https://chalikyansusanna.home.blog/2020/01/21/%D5%A8%D5%B6%D5%AF%D5%A1%D5%AC%D5%B4%D5%A1%D5%B6-%D5%BF%D5%A5%D5%BD%D5%A1%D5%AF%D5%B6%D5%A5%D6%80/>
12. https://biblioclub.ru/index.php?page=book_red&id=446135

ՀԱՎԵԼՎԱԾ 1

Հայտորոշիչ թեստ

1. Նշվածներից որն է **K k** տառով բառերի շարքը:



2. Որ բառի մեջ է կիրառվում **ou** երկտառը:

- Ա. une p....pée
- Բ. une p....re
- Գ. unto

3. Նշվածներից որն է **une souris** բառի հայերեն տարբերակը:

- Ա. Տիկնիկ
- Բ. Մուկ
- Գ. Գալլ

ՀԱՎԵԼՎԱԾ 2

1. Ուսումնական քարտ երրորդ խմբի համար:

2.

1. Դիտել, ուսումնասիրել քարտերում զետեղված նկարները և կռահել ուսուցանվող տառը ըստ այդ պատկերների:



2. Գրի առնել գտած տառը տետրերում:

3. Վերհիշել տվյալ տառի վերաբերյալ անցած երգը և փորձել խմբով երգել:

2. Ուսումնական քարտ երկրորդ խմբի համար:

1. Գտնել քարտերում զետեղված պատկերների անունները:



2. Գրի առնել բառերը տետրերում, դասագրքի նյութից դուրս բերել այդ բառերով կազմված բառակապակցություններ:

3. Կարդալ և թարգմանել դասից այդ բառակապակցություններով նախադասությունները:

3.Ուսումնական քարտ առաջին խմբի համար:

1.Գտնել քարտերում զետեղված պատկերների անունները



2. Դուրս բերել այդ բառերով կազմված բառակապակցությունները, ապա այդ բառակապակցությունները օգտագործել նախադասությունների մեջ:

3. Կատարել գործնական աշխատանք՝ գծապատկերով ցույց տալ դասի գլխավոր, բանալի բառերը ընդգծելով նոր երկտառերը:

ՀԱՎԵԼՎԱԾ 3

ԵԼՔԻ ՔԱՐՏ

1. Հետաքրքիր էր արդյոք տարբերակված առաջադրանքներով աշխատել:

Ա. այո

բ. Ոչ

2. Կցանկանայիք նորից նման խմբային աշխատանքներ կատարել:

Ա. այո

բ. Ոչ

3. Ինչ առաջարկներ կամ դիտարկումներ ունեք տարբերակված ուսուցմամբ դասերի վերաբերյալ:
